

श्री
वाग् दुवालय
ता
रा
ती
र्थ



सम्पादक:-

श्री वद्रीरत्न वज्राचार्य

श्री
वाग् दुवालय
तारा तीर्थ

संस्पादकः—

श्री वद्रीरत्न वज्राचार्य
मन्त्रसिद्धि महाविहार
(येँ, महाबौद्ध, छेँ)

आयोजकः—

श्री महेन्द्ररत्न वज्राचार्य
मन्त्रसिद्धि महाविहार
(सवल बहाः, येँ)

प्रकाशकः—

वज्राचार्य अध्ययन मण्डल
कान्तिपुर

प्रकाशकः— वज्राचार्य अध्ययन मण्डल
ये ।

इच्छा दुपिसं न्ह्याहसियां नं थ्व सफू छापे
यानाः पिकाये ज्यू ।

(सर्वाधिकार स्वतन्त्र)

विथनागु दं:- बु. सं. २५३३
ने. सं. ११०६
बि. सं. २०४६
ई. सं. १६८६

मू:- २/-

छत्वाः खँ

झी नेपाले तीर्थत यक्वों दु, हानं उपतीर्थ धका नं दु, व दक्व तीर्थया बाखँत नं दु, वाखँ दक्को संस्कृत भाषाय् लाना च्वन । मासे सित थ्व सफू मद्दु, दुमेसिया ध्याकोय् चाँछोया धू दंका छोट ।

थ्व स्वयम्भू महापुराणे ४४ अध्याय यागु खः । उपतीर्थ मध्ये वाग्दुवालया तारातीर्थया बाखँ सफू च्वया बियागु जुल । न्हापा छक्वः ताराब्रत सफुति नं पिकाये धुंगु खः, उकी स्वया द्वंगुलि सचे याना बियागु दु । च्व जक च्वया बियागु खः, थूगु सफूति प्रुफ स्वया माक्व बिचाः याम्ह सवल बहाया काय्मचा महेन्द्ररत्न यात आपालं धन्वबाद दु । थथे नेपालया बुद्धशासन महा-यान बज्रयान यात सेवा याये फयेमाः धेगु आशिर्वाद न दु । वज्राचार्य अध्ययन मण्डलया शिष्य बच्चु मणि नं थ्व सफू थःगु प्रेसे छापे यायेगु भारा कया बाँलाक स्वया छापे यागुलि सदां शुभ मङ्गल जुयेमा धेगु आशीर्वाद ।

थ्व सफू पिथना ब्यूँपि ब. अ. म. यात बज्रयान महायान बौद्ध धर्मया संरक्षण संवर्द्धन याये फयेमा धेगु मनं तुना ।

थ्व चिकिया धेगु सफुति द्वंगु स्यंगुलि क्षमा पवना च्वना । पिहां वक्व सफू न्याना कया सहयोग यापि ग्राहकवर्ग व भक्त जन पित्त तः धेगु धन्यवाद ।

—बद्रीरत्न

जिगु खँ

थुगु सफू जोगु नेपाले अतिकं प्रसिद्ध जुया जन समाजे वया च्वंगु धर्म ग्रन्थ स्वयम्भू महापुराण धंगु संस्कृत भाषाया विशाल काय भराय् धंगु सफूया मध्ये चतुर्वत्वारिंशत् अध्याय अर्थात् ४४ पी प्यंगू अध्याय यागु खः । थुगु संस्कृत भाषा यात हिका नेपाल भाषां च्वया बिज्याम्ह वसपोल गुरु वज्राचार्य श्री बद्रीरत्नजु खः । जोगु नेपाले तीर्थ उपतीर्थ आदि आपालं दया उक्थिगु आख्यात नं दै च्वंगु खः । थुगु व्याक्व तीर्थ उपतीर्थ यागु आख्यात बाखें प्रकाशे ह्ये फःसा स्थान स्थानान्तरया तीर्थया खें सि धयागु मनंतुना च्वना ।

श्व हे इवल्य थुगु चीचा धंगु वाग् दुवालया तारातीर्थ यागु महात्म्य प्रकाशे वःगु जुल ।

थुजोगु खँ राग, द्वेष, मोहं प्रसितगु समाजय् जुया वनीगु घटनात खः । अले उजोगु बिकत शंकतय् दुना च्वं पित्त उद्धार यायेत लोकय् सत्पुरुषपि उत्पन्न ज्वीगु खः ।

थुगु सफू यात प्रकाशे ह्येत फुगु चाःगु ग्वहालि याना बियागु जुल । अले थुगु सफू यात मुद्रण याःम्ह थःगु हे प्रेसे पपुलर आर्ट प्रिन्टिङ्ग प्रेसया श्री बच्चु मणि वज्राचार्य जुल व प्रकाशक वज्राचार्य अध्ययन मण्डल जुल । थथे सकल सिगु सहयोगं थथे प्रकाशे वःगु खः । थुजोगु पुण्य सम्भारं पूर्णगु कार्य सदां सकलसितं याना वने फयेमा धंगु मनं तुना च्वना ।

श्री
वाग् दुवालया
तारा तीर्थ

गोपुच्छ पर्वतस विज्याना भगवान्
बुद्धं सकलसियां ताये दयेक मैत्रीय
बोधिसत्त्वयात तारा तीर्थ धालसां
थोंकन्है वाग् दुवाल (तारा तीर्थ) या
खँ कना विज्यागु जुल—

परापूर्व काले हिमालय पर्वतया समीपे
हिमवती धयागु ग्रामे गुणाकर धयाम्ह
ब्राम्हण छम्ह दया च्वन । उम्ह ब्राम्हणया
धनाकर धयाम्ह काय् छम्ह दुगु जुल ।

उम्ह धनाकर काय् यात कुले लोम्ह
मिसा स्वया व्याहा याना बिया तःगु जुल ।

थुम्ह धनाकर काय् मचां अभक्षगु वस्तु
नया अय्ला, थ्वँ, त्वना ला लागु नया यो यो
थें सना वेश्यातय् थाय् वना मनपरी सना
जुल । वया अबु गुणाकरं थथे यो योथे
सना जुये मते धका न्ह्याक्वो धाःसा नं खँ
मन्यो, यो यो थे हे सना जूम्ह जुल तर
काय् यात न्वान्वां हे छन्हु अबुम्ह सिना वन ।

अबुम्ह सिना वने वं ज्ञान धाःला मदया
ब्राम्हण यो यो थे मने वःथे मनपरि नया
त्वना सना जूगु जुल ।

थुम्ह धनाकरया कला धाःसा तच्चतं हे
सुन्दरी बाँला, शीलवान् दयावान्, क्षमावन्त
कुल धर्मं च्वना पतियागु सेवा याना पति
व्रता धर्मं च्वना च्वंम्ह थन्याम्ह कला दतनं
धनाकरं वेश्यातय् थाय् वना अय्ला, थ्वँ
त्वना मनपरि सना जूगु जुल । थथे धनाकर

सना जूगु स्वये मफया कलाम्हसियां भाःत
यात थथे धाल-

हे नाथ, हे स्वामी, छल्पोलं थथे अभक्ष
वस्तु नया त्वना छाया सना बिज्यानागु,
स्वया बिज्याहुँ । अबु हाहां हे सिना वने
धुंकल । आः छल्पोलयात थथे सना जुये मते
धेपि सुं मन्त, छल्पोल अय्ला, थ्वँ त्वना
यो यो थें सना बिज्याना चवन तिनि न्वाइ-
पि धाइपि सुं मन्त, आः छल्पोल थथे नया
त्वना सना बिज्याये मते ।

थथे धका बिन्ति याःम्ह कला खना
धनाकरं ज्ञान तँ चाया कलायात तुं सापमिकं
ब्वो बिया दाया कसा याना छेँ पितिना
हःगु जुल । थथे भाःतं ब्वो बिया दाया छेँ
पितिना हसेलि उम्ह पतिव्रता ब्राम्हणनी
तचवतं नुगः मछिका अन वने थन वने
मसया गुं पाखे स्वया वना गुं गुं चा चा ह्युं
ह्युं वना चवन । छथाय् गुंसिमा क्वे चवना

तच्चोतं नुगः मछिका खव खवं थथे मति
 ब्राम्हणनी नं लुये कल- जि पूर्व जन्मे छु
 पाप याना वयागु पापं थुगु जन्मे थ्वथेंजाम्ह
 दया मदुम्ह निर्दयी भाःत लात, आः जि गन
 वना चवं वने । सुइथाय् वना चवं वने ?
 जिथें जाम्ह दुःखी अभागिनी थ्व जगते सुं
 दै मछु । थ्व जगते जि म्वाना चवने मेल,
 भाःतं मयय्का भाःतं पितंका छु म्वाना चु
 चवने, बरु सिना वनेगु हे जित जिल, सी
 धका धयां नं छुयाये ? कालमवः, आः जि
 थ्व हे जंगले प्राण हत्या (आत्माघात)
 याना सिना वने । थथे मतिई तया नुगः
 मछिका उम्ह ब्राम्हणनी पर्वत चाः चाः हि
 हयुं वना चवंवले छथाय् गुफाय् बिज्याना
 चवंम्ह मुनि छम्ह खंगु जुल ।

खने वं उहा ब्राम्हणनी मुनियाथाय् वना
 मुनियात थथे बिन्तियाना न्यन-हे मुनि, छल्पोल
 थुगु गुँइ एकान्त छाय् बिज्याना चवं चवनागु ?

थथे न्यंगु खँ न्यना मुनि आज्ञा जुल-
हे भद्रे कल्याणी, मन तया न्यो, हिमालयया
समीपे थुगु गुँइ एकान्त च्वं च्वनागु आपालं
दत्त । कारण जन्म जुयेव अवश्य सिना वने
माः । न्हापायागु जन्मे यानागु थुगु जन्मे
भोग यायेमाः । थुगु जन्मे यानागु लिपाया-
गु जन्मे भोग यायेमाः । भिगु शुभ कर्म
याःसा सुखं जीवन हने दै । मखुगु मभिगु
अशुभ कर्म याःसा यत्र वा परत्र थुगु लोके
नं मेगु लोके नं दुःख भोग याये मालि ।

संसारे जन्म, जरा, ब्यधि, मृत्यु थ्व
तःथंगु दुःख खः । संसारे थ्व दुःखं मुक्त्त
जुइगु इच्छां थ्व जंगले च्वना व्रत याना
च्वनागु खः ।

हे भद्रे ! छ सु ? सुया मिसा ? छंगु
नां छु ? छ छाये थन्यागु जंगले एकान्ते
वया च्वनागु ? छं सु सहायता दु ? छ लिसे
सु दु ? छ सु लिसे वयागु ? थ्व फुक्क छं जित

बाँलाक धा—

थबले थथे मुनि न्यंगु खँ न्यना उम्ह
ब्राम्हणनी नं मिखां ख्वबि स्वः, स्वः,
वयेका हिकु हिकु लं लं तःधंगु दुःखं आकुल
व्याकुल जुयेका थथे बिन्ति यात—

हे मुनि, न्यना बिज्याहुँ जिगु दुःख,
थुगु हिमालयया समीपे च्वंगु ग्रामे छम्ह
गुणाकर धयाम्ह ब्राम्हण छम्ह दु, थुम्ह
ब्राम्हणया तच्चोतं हे दुराशय जुया च्वंम्ह
धनाकर धयाम्ह काय् छम्ह दु, थ्व धनाकर
गन्याःम्ह घालसा अय्ला, थ्व त्वना वेश्या-
तय् थाय् वना अनाचार जुया ला ला थें
सना जुया च्वन । अबुम्हला काय् लिसे हा
हां हे सिनावन, अबु सीवं झन धनाकर यो
यो थें मने वःथे सना छें ला द्वां हे मवः ।
बल्ल बल्लं धनाकर छें द्वाहां वयेव जि थथे
सना बिज्याये मते धका बिन्ति याना झन,
जितः हे दाया छें पितना हल । थथे दुरा-

शय् जुया च्वंम्ह धनाकर ब्राम्हणया चरण
सेविका जि खः, हे मुनि ! जि- तच्चोतं
मण्ड भाग्यम्ह, तच्चोतं दुःखीम्ह खत ।
अकें जि थुगु गुँइ प्राण तोता वने धका गुं गुं
चा चा हिला चवनाम्ह जि खः ।

अथे ब्राम्हणनी नं खया खया ब्रिन्ति
यागु खँ न्यना मुनि हाकनं आज्ञा जुया
बिज्यात हे कल्याणी, छन्त हितयायेया कारणे
कने त्यना, छं मन तथा न्यो- छं न्यंला ?
संसारे मानव धालसां मनुष्य धायेका जन्म
जुयेगु तच्चोतं हे दुर्लभ, पूर्व जन्मे याना
वःगु तःधंगु पुण्यसम्भारया भाग्यं जक
मानव धायेका जन्म काये दै, संसारे दुःख,
रोग, नाना भय् मदय्केत आर्यताराया
जपयां भजनया, लुमंकि । हे कल्याणी छं
बाँलाक न्यो, आत्मधात याना सिना वं
पिसं कर्मबिपाकं दुःख भोग याःगु । छगू
शहरे तच्चवतं दयावान्म्ह, धनवान्म्ह, धर्म

ग्योम्ह महाजन छम्ह दया चवन । उम्ह
महाजनया कलाः धाःसा अहंकारी दुश्शी-
लम्ह दुर्मतीम्ह जुया चवन । भाःतं न्ह्याक्व
हे साःगु भिगु नकूसां साः धका मधाइम्ह,
तिसां तिका पुंका तःसां तिकल धका मधैम्ह,
लुमधंम्ह, न्ह्याबलें भाःत लिसे ल्वापु जक
थैम्ह जुया चवन । थथे चितासु मदुगुलि
महाजनं मेम्ह हे मिसा बिबाह याना हल ।
भाःत मेम मिसा हःगुलि तं चाया थबले
दुराशय जुया चवंम्ह न्ह्येथुम्ह कला पुखुली
क्वबाना आत्मघात याना सिना वन । तर
पुखुलि क्वबाना आत्म घातयाना सिना
वंगुलि यमलोके अने अनेगु तरके वना कर्म
भोग याये माल- हे ब्राम्हणी, उकिं थथे
आत्मघात याये मते । छं दुःखं मुक्त जुयेगु
इच्छा दःसा श्री आर्य्यतारा देवीयागु
भजनया ।

श्व संखोद पर्वतया पूर्व पाखे अमिता-

भ जिनया आज्ञानुसारं जगतयात तरे याये
धका बिज्याना चवंम्ह श्री आर्य्यतारा देवी
या तारा तीर्थ दया चवन । थथे न्यागु
महान् उत्तम जुया चवंगु तीर्थे वना स्नान
याना श्री आर्य्यतारा देवी सुमरण याना
पूजा याना भजनया छंगु दुःख दक्क शान्त
ज्वी ।

थथे मुनि आज्ञा जुया बिज्याःगु खँ
न्यना हाकनं ब्राम्हणनी नं बिन्ति यात-

हे मुनि ! थुगु तारा तीर्थ, गथे जुया
दया वःगु ? थुगु खँ कृपा तया आज्ञा
दयेका बिज्याहुँ । थथे बिन्ति याःगु न्यना
मुनि आज्ञा दयेका बिज्यात- हे कल्याणी,
तारातीर्थ दया वःगु खँ जि कने, छं न्यो-

छगू समये दैत्यतसें ब्रम्हा, बिष्णु,
महाद्यो, इन्द्र पिन्त च्यूत यासेलि देवतापि
सकलें श्री उग्रतारा याके शरण बिज्याःगु
जुल । उम्ह योगिनी श्री आर्य्यतारा यागु

हृदयमन्त्र जपया धका आज्ञा जुसेलि देव-
तापि सकलें बिज्याना थौ कन्हें तारा तीर्थ
धयागु वाग्दुवालस वया श्री आर्यतारा देवी
यागु मन्त्र देवतापिसं जपयासेलि वस्पोल
जगत जननी श्री आर्यतारा देवी उगुतीर्थ-
स प्रतक्ष जुया जिज्याना ब्रम्हा, विष्णु,
महाद्यो, इन्द्र आदि देवता पित्त उद्धार
याना बिज्याःगु जुल । हे ब्राम्हणनी आः
छ नं श्री उग्रतारा बज्रयोगिनी दर्शन पूजन
याना उगु हे तीर्थ वना स्नान याना फुर्थें
जपयाहुं, पूजा याहुं ।

थथे मुनियागु बचन न्यना, उम्ह
ब्राम्हणनी मन् हर्षयाना उगु पर्वत गया
श्री उग्रतारा बज्रयोगिनी दर्शन याना उगु
थासं नं पर्वत गया वना तारा तीर्थ थ्यंका
स्नान याना फुर्थें पूजा भाव याना जप
याना चुं च्वंगु जुल ।

थबले श्री आर्यतारा देवी उम्ह

ब्राम्हणनी यात करुणातया उद्धार यायेत
प्रतक्ष जुया बिज्यात ।

थबले उम्ह ब्राम्हणनी नं दण्डवत
प्रणाम याना थथे स्तुति यात-

वर बिह्य तारा

द्रव्य बिह्य तारा ।

इच्छा बिह्य तारा

रत्न बिह्य तारा ॥

अले बसपोल श्री आर्य्यतारा देवीं वर
प्रसाद बिया अनहे सं अन्तर धान जुया
बिज्याःगु जुल ।

उम्ह ब्राम्हणनी नं उगु तारा तीर्थस
चवना श्री आर्य्यतारा देवीया व्रत चवना
त्रिरत्नया शरण वना सिसा - बुसा आदि
नया तीर्थया जल त्वना जीवन हना अन्त-
काले निधन जुया वंसेंलि सुखावती भुवनस
बास ला बंगु जुल ।


थव खँ भगवान् बुद्धं मैत्री बोधिसत्त्व-

यात कंगु खँ ववचाल । श्व खँ स्वयम्भू
महापुराणे उपतीर्थ महात्म्ये ४४ पीप्यंगु
अध्याययागु जुल ॥ शुभम् ॥ ० ॥

॥ आर्यतारा स्तोत्र ॥


तारा मारभयङ्करी सुरवरैः,
सम्पूजिता सर्वदा ।
लोकानां हितकारिणी जयति सा
मातेव या रक्षति ॥
कारुण्येन समाहिता बहुविधा
संसारभीरुजनान् ।
माता भक्तिमतां विभाति जगतां
नित्यभयं ध्वंसिनी ॥०॥

नमस्तारे तुरे वीरे
तुत्तारे भयनाशिनीम् ।
तुरे सर्वार्थ दे तारे
स्वाहा कारं नमाम्यहम् ॥०॥



सफू दैगु थाय्:-

- १) श्री वद्रीरत्न वज्ज्राचार्य, महाबौद्ध, येँ ।
- २) श्री महेन्द्ररत्न वज्ज्राचार्य, सबल वहाः, येँ ।
- ३) श्री वज्ज्राचार्य अध्ययन मण्डल, येँ ।
- ४) पपुलर आर्ट प्रिन्टिङ्ग प्रेस, सबल गल्लि, येँ



छगूया मू:- २/- तका जक